



Broj: 01/5-50-1-6-15/08
Sarajevo, 3.3.2008.godine

Z A P I S N I K
15. sjednice Komisije za saobraćaj i komunikacije,
održane 3.3. 2008. godine

Sjednica je održana 3.3.2008., s početkom u 14,10 sati.

Sjednici su prisustvovali članovi Komisije:

1. Branko Dokić, predsjedavajući
2. Šemsudin Mehmedović
3. Slavko Matić
4. Sadik Bahtić
5. Mehmed Suljkanović
6. Husein Nanić

Opravdano su odsustvovali: Snježana Rajilić, Selim Bešlagić i Savo Erić.

Iz Državne regulatorne komisije za električnu energiju sjednici su prisustvovali: Nikola Pejić i Vladimir Dokić, članovi Komisije, i Edin Zametica, šef zajedničkih poslova. Sjednici je prisustvovao i sekretar Komisije za saobraćaj i komunikacije Ahmed Jalovičić.

Predsjedavajući je predložio sljedeći

D N E V N I R E D

1. Usvajanje Zapisnika 14. sjednice Komisije;
2. Razmatranje Izvještaja o radu Državne regulatorne komisije za električnu energiju u 2007.godini;
3. Tekuća pitanja:

Dnevni red jednoglasno je usvojen.

Ad. 1.

Zapisnik 14. sjednice Komisije jednoglasno je usvojen, bez primjedbi.

Ad. 2.

Predsjedavajući je pozvao predstavnike Državne regulatorne komisije za električnu energiju da daju uvodnu riječ o Izvještaju radu u 2007.godini (u daljnjem tekstu : Izvještaj).

Nikola Pejić istakao je da je Državna regulatorna komisija za električnu energiju (u daljnjem tekstu : DERK) nezavisna i neprofitna institucija koja se finansira iz regulatornih naknada, a ne iz budžeta, kako bi

se na taj način sačuvala nezavisnost u radu. U 2007. godini DERK je održao 11 redovnih sjednica, 24 interna sastanka i organizirao 14 javnih rasprava. Komisija je provodila aktivnosti na usvajanju i odobravanju niza dokumenata, te naveo da je DERK u februaru 2007. donio Odluku o izmjenama i dopunama Metodologije za izradu tarifa za usluge prijenosa električne energije, nezavisnog operatera sistema i pomoćne usluge, s namjerom da se domaćim kupcima osigura prioritet u snadbijevanju i bolja poziciju na tržištu. DERK je inicirao izradu Pravilnika o priključku, kojim će se na jedinstven i jasan način regulirati priključenje novih korisnika na prienosnu mrežu. Indikativni plan razvoja proizvodnje električne energije u BiH izrađuje se za desetogodišnji period, a svake godine inovira se za sljedeću godinu koja nije obuhvaćena planom. Cilj plana je da informira korisnike o potrebama i postojećim projektima izgradnje novih proizvodnih kapaciteta, a istovremeno se plan koristi i kao osnova za izradu Dugoročnog plana razvoja prienosne mreže za period od deset godina. Otvaranjem tržišta električne energije u BiH pojavila se potreba za uređenjem i donošenjem pravila koja reguliraju dodjelu prekograničnih prienosnih kapaciteta, pa je DERK odobrio sljedeća pravila: Pravila za dodjelu prekograničnih prienosnih kapaciteta na godišnjem nivou u 2007. godini i Privremena pravila za dodjelu prekograničnih kapaciteta na mjesečnom nivou u periodu od 1.1.2007. do 30.6.2007. godine.

U 2007. godini obnovljene su izdate licence za međunarodnu trgovinu električnom energijom, te su vođeni i postupci izdavanja privremenih licenci subjektima koji se prvi put pojavljuju na tržištu kao međunarodni trgovci električnom energijom. Tokom 2007. godine DERK je pratio rad licenciranih subjekata i usklađenost njihovog djelovanja sa uslovima korištenja licenci, naročito za regulirane djelatnosti koje obavljaju NOSBiH i Elektroprijenos BiH. Praćenje ovih aktivnosti vrši se analizom redovnih i vanrednih izvještaja koje podnose licencirani subjekti, kao i posjetama vlasnicima licenci, sa ili bez najave.

U Izvještaju o obavljenom pregledu aktivnosti i dokumentacije Elektroprijenosa BiH, stručni tim DERK-a uočio je podijeljenost članova uprave Elektroprijenosa u izradi dugoročnog plana razvoja prienosne mreže za period od 2007. do 2016. godine, ali i u brojnim drugim pitanjima. Zabrinutost ovakvim stanjem DERK je izrazio entitetskom vladama u novembru 2007. godine.

U izvještajnom periodu DERK je u dva navrata odobravao tarife za usluge prijenosa električne enrgije, rad NOS-a i pomoćne usluge po zahtjevima reguliranih kompanija. Tokom 2007. godine međunarodna trgovina električne energije u BiH bilježi pad u odnosu na prethodnu godinu, što je najviše uslovljeno smanjenjem proizvodnje iz hidroelektrana. DERK je i u 2007. godini djelovao u pravcu zaštite kupaca električne energije, posebno zaštite socijalno ugroženih kategorija stanovništva, aktivno se uključujući u sve inicijative institucija na državnom nivou i pripremu Modula 7 Studije energetskeg sektora u BiH- Podrška socijalno ugroženim potrošačima električne energije. Aktivnosti na izradi Studije energetskeg sektora u BiH počele se u novembru 2006. godine i Studija bi trebalo da bude završena krajem marta 2008. godine. DERK je aktivno učestvovao u radu međunarodnih tijela čija se djelatnost odnosi na reguliranje tržišta električne energije.

Mehmed Suljkanović smatra da je Izvještaj kvalitetno sačinjen i da je za pohvalu činjenica da je Ured za reviziju pozitivno ocijenio poslovanje DERK-a. Naveo je da je neophodno naći efikasan način zaštite socijalno ugroženog stanovništva, s ciljem zaštite ove kategorije potrošača električne energije. Postavio je pitanje primjene ranije donesene Studije razvoja energetskeg sektora iz 2004. godine, u kojoj se spominje i Strategija obnovljivih izvora energije.

Edin Zametica odgovorio je da je ranije urađeno više studija na nižim nivoima, da je za Bosnu i Hercegovinu najznačajna izrada Studije energetskeg sektora u BiH, koja će biti osnova za izradu energetske strategije na državnom nivou. Što se tiče cijena električne energije u BiH, činjenica je da su cijene relativno niske, ali pošto je slaba kupovna moć stanovništva, potrebno je da država zaštiti socijalno ugrožene kategorije. Republika Srpska učinila je dosta na planu zaštite, kao i Kanton Sarajevo, a DERK je izrazio interes da sarađuje s nadležnim institucijama na ovom pitanju.

Branko Dokić smatra da je bitno usklađivanje zakonskih propisa, a ne samo podzakonskih propisa, kako je navedeno u Izvještaju. Država mora imati sinhronizirane planove za energetiku, koja je strateško pitanje Bosne i Hercegovine, te je stoga nužno organizirati javnu rasprava o Indikativnom planu razvoja proizvodnje električne energije u BiH.

Vladimir Dokić ukazao je da je Tržišnim pravilima propisano da Indikativni plan predlaže Nezavisni operater sistema za prijenosni sistem u BiH, a da ga DERK usvaja.

Branko Dokić pitao je na osnovu čega se realizira projekat USAID-a: Asistencija regulativi i reformi energetskog sektora i projekat Evropske komisije: Tehnička pomoć regulatornom sistemu sektora energetike BiH, kao i koje su aktivnosti DERK-a vezane za ove projekte.

Edin Zametica odgovorio je da projektne zadatke definira Ministarstvo vanjske trgovine i ekonomskih odnosa BiH u saradnji s donatorima i da rezultati projekata imaju reperkusije na rad regulatora u BiH. Projekat Evropske komisije počeo je u septembru 2007. godine i Vlada Republike Srpske imala je rezervu prema ovom projektu, pa je usaglašeno da se projektni zadatak redefinira u skladu s činjenicom da u BiH djeluju tri regulatorne komisije.

Vladimir Dokić istakao je da ne može diskutirati o neko projektima i rješenjima, ukoliko za te projekte ne postoji saglasnost Vlade Republike Srpske.

Branko Dokić pitao je koje su aktivnosti DERK-a odnose na Treći paket liberalizacije energetskog tržišta, s obzirom da se radi o evropskom dokumentu koje se tek planira.

Edin Zametica odgovorio je da je Treći paket liberalizacije energetskog tržišta jedna od najznačajnijih aktivnosti u energetskom sektoru Evropske unije, a da je Ugovorom o osnivanju energetske zajednice predviđeno da je za sve direktive iz energetskog dijela koje se usvoje u Evropskoj uniji potrebno izvršiti transpoziciju u nacionalno zakonodavstvo, pa je nužno da DERK prati realizaciju ovako bitnog dokumenta.

Branko Dokić pitao je da li se Pravilnik o priključku odnosi i na alternativne izvore energije, kao što je proizvodnja električne energije pomoću vjetra i sunca, te da li se predviđaju subvencije za ovakav način proizvodnje električne energije.

Nikola Pejić odgovorio je da će Pravilnikom o priključku biti obuhvaćena i cjelokupna procedura za priključenje i ovakvih korisnika na prijenosnu mrežu.

Vladimir Dokić ukazao je da je u entitetima predviđena povoljnija cijena za ovakve proizvođače, ali da smatra da bi trebalo definirati ciljeve subvencioniranja.

Edin Zametica istakao je da postoje odluke entiteta da se proizvodnja električne energije iz obnovljivih izvora subvencionira (za male elektrane, vjetroelettrane, geotermalnu i solarnu energiju), jer su troškovi ovakve proizvodnje veći. Mišljenja je da je potrebno odrediti kvotu za subvencioniranje, uzimajući u obzir i ekonomske i tehničke razloge.

Nakon rasprave, Komisija je jednoglasno prihvatila Izvještaj o radu Državne regulatorne komisije za električnu energiju u 2007. godini.

Komisija je usvojila i sljedeće zaključke:

1. Uzimajući u obzir značaj elektroenergetskog sektora Bosne i Hercegovine i potrebu primjene novih direktiva i propisa Evropske unije iz oblasti električne energije, obavezuje se Vijeće ministara BiH da pristupi izmjenama i dopunama postojećih zakona, i to : Zakona o prijenosu, regulatoru i operateru sistema električne energije u BiH („Sl. glasnik BiH“, br. 7/02 i 13/03), Zakona o osnivanju kompanije za prijenos električne energije u BiH („Sl. glasnik BiH“, br. 35/04) i Zakona o osnivanju nezavisnog operatera sistema za prijenosni sistem u BiH („Sl. glasnik BiH“, br. 35/04).

2. Predlaže se Nezavisnom operateru sistema u Bosni i Hercegovini da organizira javnu raspravu o Indikativnom planu razvoja proizvodnje električne energije za period od 2009. do 2018.godine, kako bi svi učesnici u elektroenergetskom sektoru imali mogućnost da iznesu svoje stavove i mišljenja.

Ad. 3.

Na prijedlog predsjedavajućeg, Komisija je jednoglasno usvojila sljedeće zaključke:

1. Traži se od Vijeća ministara BiH da Komisiji dostavi izvještaj o aktivnostima na projektu „Autoput na Koridoru Vc“ u 2007.godini i Plan narednih aktivnosti.
2. Traži se od Vijeća ministara BiH da Komisiji dostavi informaciju o provođenju Strategije razvoja sistema za upravljenje zračnim saobraćajem u Bosni i Hercegovini.
3. Komisija će u 2008.godini organizirati Javnu raspravu s ciljem analize postojećeg stanja u primjeni Zakona o osnovama sigurnosti saobraćaja na putevima u Bosni i Hercegovini („Sl. glasnik BiH“, br. 6/06, 44/07), kako bi svi zainteresirani imali mogućnost da iznesu svoje stavove i mišljenja u vezi s uočenim nedostacima i problemima u primjeni ovog zakona, uključujući i eventualne prijedloge za njegove izmjene i dopune.

Na prijedlog Šemsudin Mehmedovića, Komisija je jednoglasno usvojila sljedeći zaključak:

Traži se od Vijeća ministara BiH i Regulatorne agencije za komunikacije BiH da Komisiji dostavi informaciju u vezi s imenovanjem generalnog direktora Regulatorne agencije za komunikacije BiH.

Sjednica je završena u 16 sati.

SEKRETAR KOMISIJE
Ahmed Jalović

PREDSJEDAVAJUĆI KOMISIJE
dr. Branko Dokić